

清賦不如撫墾

嘗讀聖書有曰百姓足君孰與不足百姓不足君孰與足蓋言其民富則君不至獨貧民貧則君不能獨富此理固明也自大清康熙戊戌之秋臺灣始入清之版圖維時之康熙君者聖君也深思台灣區區土地不過為海外之彈丸已耳由是垂訓後世謂清賦之法永不舉行猗歟休哉四海永清天下大定億萬姓咸頌君之大德矣繼自光緒十四年間有欽差劉銘傳出奏舉行清賦之法既違先君之垂訓又啟後起之禍端適有施姓氏者家亦小康性原忠直思此法苟行民之憔悴於虐政也必矣故倡首作亂抗拒甚嚴劉欽差無何特遣沈布政到處招安出示賦稅從輕不日間萬姓悅服不藉干戈而自平矣及後劉欽差因思撫墾為上策也曾由大坵坎闢之彼時生番歸順者不可勝數未幾適逢我帝國到臺故廢弛至今也由劉銘傳清賦而來至於今僅十年耳其已成甲者所賦已定其未成甲者究屬荒蕪之埔雖有耕亦不得食今清賦忽又舉行是田土不能加田焉能稅工又加稅乎我等因思清賦不如撫墾也且撫墾亦生財一大道也曠觀由臺北至台南一望深山土地至其寬也材木亦良多也第未闢之則視為廢地耳從此而闢之可就其處之為匪或歸順者收而用之各司其業可無悖逆之舉由是就其材木最大者取之可為輪船之用餘亦可燒之為腦炭之資他若

閒曠之地經畫而為園為田由此而生財靡窮矣何用再舉清賦為哉所願在上位者善於運籌勿勞民傷財也則幸甚

其一 房屋不可徵稅其理有四試為明其說

原夫臺地自昔之時四處皆生番圍繞居住中華人僅得海濱之域以居焉凡近海濱者遍處設立隘寮以防生番之患至康熙戊戌年間眾思此生番無以驅而遠之其患恐常不及防由是眾百姓各出資本率眾隘兵同心協力不惜性命各奮身直前遂驅一派生番於內山而居之維時民人各就其地建房屋而安居焉自此奉 上任官分治始經畫其

井地遂出示曉諭謂此回臺地實爾等民心向往殺身不顧故得此土地由此所建之房屋各准免徵稅以慰爾等一片之苦心始基如此此房屋不可徵稅者一也

且我等欲建一房屋必先費出多之銀而後得成為房屋此但為安身之計殊無利可生試思以建房屋之費銀苟轉而借於人每年亦可得租金之入今所費銀以建房屋不但每年無利金可入並無母金可返此房屋不可徵稅者二也推之商店凡什貨既各徵稅有貨自必有店可貯而後貨不至紛失之虞是貨本與店合為一體既徵貨又徵店不啻以一牛而欲剝兩皮此房屋不可徵稅者三也

况近年以来飢饉戰臻凡士農工商日用之常所入不供所
出身家性命民之自願尚未遑而竟欲徵其房屋之稅民必
舉疾首感頰而相告曰我 帝國之好徵稅夫何使我慘極
至此也是開古所未有之例也此房屋不可徵稅者四也
聖人有言民為邦本本固邦寧我 帝國今徵此房屋之稅既
違此四理又失諸民心恐邦本不固難保無後患矣我等有
心人所以涕泣俯陳專望率由舊章勿別創新法也切禱

稟請

內閣總理大臣大人將下情轉奏

天皇大皇帝陛下

明治三十一年八月 日全臺眾紳商及萬民仝訴

內閣總理大臣伯爵
大隈重信殿

大日本東京交

閣總理大臣伯爵大隈重信殿

全臺眾紳商及萬民仝啟



至急公文

シ